

Date – 04/07/2025

Time - 18:30 -18:40Hrs

Regional News Unit AIR Aizawl

Friday, July 04, 2025

AKASHVANI AIZAWL
REGIONAL NEWS BULLETIN

HEADLINES (EVENING)

1. Mission Shakti hnuaia hmalakna kal zela a buatsaih, kum tling lova inneih khapna dan , Prohibition of Child Marriage Act, 2006 chungchang inhrilhhriatna vawiin khan Aizawlah buatsaih a ni.
2. Congress Party chuan 'India Danpui Humhimna leh Mizoram Mipui Thlavang Hauhna' hun Aizawl Vanapa Hall kawt-ah vawiin khan an hman.
3. Ramchhung hmar thlang lamah fur ruahtui a tlak tam avangin IMD chuan mipuite inralring tura hriattirna a ti chhuak.
4. Prime Minister Narendra Modia chuan Trinidad and Tobago-a cheng India mi chhuan 6 na te chu Overseas Citizen of India (OCI) card pek an ni tawh dawn tih a sawi.



MISSION SHAKTI

Directorate of Women & Child Development (WCD) State Hub for Empowerment of Women (SHEW), -in Mission Shakti hnuaia hmalakna kal zela a buatsaih, kum tling lova inneih khapna dan , Prohibition of Child Marriage Act, 2006 chungchang inhrilhhriatna neih a ni a, Mizoram State Legal Services Authority (MSLSA) Member Secretary Pu Vincent Lalrokiman a hmanpui.

Women & Child Development Director Pi Zoramthangi Chhangte chuan ramchhung hmun danga ‘child marriage’ an tih ang tak hi Mizo-te zingah awm lo mah se kum tling lova inneih hi he dan hian a huam tel tih leh naupangte chanvo

bawhchhiatna lian tak a nih thu a sawi a. Hetiang kaihnawih thubuaite chu a hun taka bawhzui a tul thu leh thawhhona tha neih a pawimawh thu a sawi bawk a ni.

Women and Child Development Department chuan sawrkar laipui bultum, Bal Vivah Mukht Bharat-Child Marriage Free India Campaign hi November ni 27, 2024 atang khan a kalpui a. Hmeichhia kum 18 an tlin hma leh mipa kum 21 an tlin hmaa inneihtir an nih loh nan hma an la mek a ni.

India ram hmun tam takah naupang kum tling lo inneihtir a la hluar hle a, Mizoramah erawh chuan tihluihna ni lovin nau an pai avang te, an inruk avangte leh inngaihzawnnain a hrin chhuah thil dang hrang hrang avangtein nu leh pa/chhungten an suihrem a, man leh mual an inhlam leh mai thin a. Hei hi khawtlang nunah suala ngaih em em ni lo mah se thil tha lo, naupangte hmakhua tichhetu a nih mai bakah dan mithmuhah thil sual a nih avangin fimkhur a ngaih thu he hunah hian tarlan a ni.

Naupangin a hun hmaa nupui/pasal an neih hian an zirna, hriselna, eizawna, ngaihtuahnate nasa takin a nghawng a, an theihna leh an thlen chinte tithuanawpin hmakhaw eng tak nei turte nun a tichhia a, nu leh pa, chhungte leh khawtlang mipuiten hetiang inneihna thleng lo tura venpuina kawngah mawhpurhna pawimawh tak an neih thu sawi a ni.

Hetieng thil thleng hria emaw hmutu chuan Child Helpline Tollfree Number 1098-ah emaw, Women Helpline Tollfree Number 181-ah emaw, Child Marriage Prohibition Officer District & Block tina WCD office-ah te, Village Council Secretary leh Community Watch Group hrang hrangte hnenah a thlen theih reng a ni.

<><><>

MZP

MZP President Pu H. Lalthianghlina chuan tun hnaia Samagra hnuiaia hna hrang hrang lakah a tling leh thiam, a thawksa leh qualified te aia qualified lo zawk lak an awm nia sawi chu an chhui mek tih a sawi a, Sawrkar hian tun July thla chhung ngei hian he hna lak hi siamtha a, a thiam leh tling zawk an awm chuan la tha leh vek turin sorkar an ngen tih a sawi a ni..

Vawiin-a MZP in I&PR Auditorium Aizawl-a Under Graduate result 2025 a Gold Medalist-te chawimawina hun an hmanna-ah a sawi a, hemi chungchangah hian Minister nen pawh sawi dun tawhin, Minister te chuan fair taka kalpui-a inrawlh loh an duh laiin ahnuailam te'n an lo ti buai leh thin niin a sawi a, Minister te hi inrawlh zawk se, endika, chhuichiang turin an duh a ni a ti.

Vawiin inkhawm hmanpuitu Lok Sabha MP Pu Richard Vanlalhmangaiha'n tunhnaia Central Service exam ah Mizo inziak tling an awm theilo chu pawl atih thu sawiin zirlaite tan chona nasa tak anih thu a sawi.

MP chuan Central Service ah Mizo an inziah tlinna chu a rei tawh hle tih sawiin tun hnuah inziak tling an awm theilo chu a pawl atih thu sawiin tuna zirlai mek te tan chona nasa tak ani a ti a, theihtawp chhuaha Mizo ti hming tha tu ni thei tura tan la theuh turin a chah a ni.

Pu Richard-a chuan Mizoram chu a la thianghlam tih sawiin rilru thinghlam tak nei an nih thu a sawi a, Mizoram hmakhua leh kaihraina kawngah thinghlam taka a

kal theih nan tuna zirlaite an pawimawh tih sawiin an hlawhtlinna chu Mizo pumpui hlawhtlinna a nih thu a sawi bawk.



MPCC

Mizoram Pradesh Congress Committee chuan 'India Danpui Humhimna leh Mizoram Mipui Thlavang Hauhna' hun Aizawl Vanapa Hall kawt-ah vawiin khan an hmang a, Bhavan thleng kawng an zawh bawk a ni.

He hun MPCC Treasurer Dr. Lalmalsawma Nghaka kaihhruaiah hian PAC Member, Pu John Siamkunga chuan BJP in Indira Gandhi hova Emergency an puang kha India Constitution thahna ni 'Samvidhan Hatya Diwas' tiin an kova, India ram chu Socialist pattern in a kal a, Socialist pattern a a kal vangin ni za inhlawhna te, food security thlengin an dawn phah a. Sakhaw tihbik nei lo Secular ram ah sakhua theuh zalen takin a biak theih a ni a ti a.

CAA te siamthat phalloh pawh BJP chuan a siamtha lui a, Christian te pheih chu foreign sakhua an ti a, Muslim pawh an telh duh lo a, ti hian zawi zawiin Kristian te an nekchep reng anga, an duh chu engtikah emaw chuan an ti dawn tho tho a ni a ti.

Pu John Siamkunga chuan ZPM pawhin engtikah emaw BJP zawm hun an la nei dawn tho a ti a ni.

PAC Member Pu John Rotluangliana chuan ZPM sorkar in BJP a la zawm loh chhan chu mipui an la zah vang a ni a ti a. Inthlan hma khan BJP sum tamtak an dawng tia sawi a awm a, inthlan hma lawkah khan sum an ngah thut a ni a ti. ZPM sorkar chuan chhiah tihsan theih zawng zawng an ti sang ni a sawiin, Sahuana zawngte en man thlengin an ti sang a ni a ti.

Pu TT Zothansanga pawhin thu sawiin, Mizoram chhung a sawhthing thar beisei zat Assembly House a zawhna Minister in a chhan dan chuan quintal nuai 14 leh sing 8 thar anih beisei thu tarlan a ni a. Kumin a sawhthing lei zat hi quintal nuai 2 sing 3 vel a ni a, Mizoram sawhthing thar a tanga sawrkar sawhthing leizat hi zaa 15 vel a ni, a ti.

Sawhthing an lei zo vek an tih laiin khaw li khaw nga an leisak a, Youtuber an kova, media ah lei zo vek angin an insawi a ni a ti bawk a ni.



CADC

Chakma Autonomous Dist Council huamchhunga khawtlang huap pawl lian pathumten PHE department-ah dilna intawm theh lutin, kumin June thla chhunga tui chhiah an chawi tur awl turin an ngen.

Chakma Autonomous District Council huamchhunga pawl lian 3 - Young Chakma Association, Mizoram Chakma Students' Union leh Chakma Mahila Samiti

bakah veng hrang hranga WATSAN Committee-te chuan Lawngtlai PHE Division-a EE hnenah Chawngte PHE SDO kal tlangin ngenna an theh lut a, kumin June thla chhung khan Kamalanagar-a department tui sem hmangtu zaa 90 vel chuan tui an dawng lo hrim hrim nia sawiin, a bak zaa 10 te pawhin hman tlak tui thianghlim leh fim an dawng lo niin an sawi.

Heng pawl hrang hrangte hian, tui thianghlim an dawn theihna tura hmalakna Chawngte Rural Drinking Water Supply Plant tihpuitlin a la ni lo chu tui an dawn mumal theih loh chhanah puhin, The Mizoram Water Supplies (Control) Act, 2024 section 19 leh The Mizoram Water Supplies (Control) Rules, 2006 Clause 7 hnuaia Sub-Clause 23 tan chhanin chhung tinten June thla chhunga tui chhiah an chawi tur chu awl turin an ngen a ni.

<><><>

CABBAGE

Champhai District-a Samthang khua chuan zikhlum tharchhuah hralh kawngah harsatna an tawk mek a, hralhchhuah kawngah sawrkar hmalak pui tura an ngenna in awmzia a neihloh avangin Zikhlum chingtute an buai mek nia thu dawn a ni.

Samthang khuaah hian chhungkaw 240 vel awmin an zinga chhungkaw 145 in eizawna atan kuminah zikhlum hi an ching mek a, zikhlum Quital 10500 vel tharchhuah hralh kawngah harsatna an tawh chu sawrkarin hriatpuia state pawn atanga zikhlum lakluh ti tawp hrih turin an ngen a ni.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

ACLCA

Aizawl City Local Council Association hruaituten nimin khan Central YMA hruaitute hmu in hnamdang mistiri rawih leh theka rate chungchang an sawipui.

Nimin tlai khan Aizawl City Local Council Association (ACLCA) hruaitute hi an President Pu C. Lalbiaknunga hovin CYMA pisa ah an leng a, ACLCA hruaitute hian Mizo hnam himna tura an ngaihpawimawh hrang hrangte Central YMA hruaitute hi an sawi pui a, Inner Line Permit (ILP) pekchhuah dan leh hmansual a

nih theih dan te leh Hnam dang Misitiri rawih dan chungchang leh Theka Rate chungchang bakah Ruihhlo do kawnga thawhho chungchang an sawipui a ni.

Central YMA hotute chuan Vengchhung thianghlimna tur leh hmasawmna atan thawhhona tha YMA leh Local Council ten neih a tul thu sawiin an thu thlen chu anlo sawiho tur thu an hrihlh a ni.

<><><>

MONSOON

Ramchhung hmar thlang lamah fur ruahtui a tlak tam avangin IMD chuan mipuite inralring tura hriattirna a ti chhuak a. July ni 5 atanga ni 8 chhungin Ruahpui vanawn, tek leh thli thawk thei reng anih thu India Meteorological Department chuan a sawi a. Furpui tuar nasa ber Himachal Pradesh ah chuan ruahsur nasa avanga chhiatna thlengah mi 69 an thi tawh a, mi 37 chin hriatlohin an bo.

Hetihlai hian Union Home Minister Amit Shaha chuan Gujarat, Himachal Pradesh, Rajasthan, Uttarakhand leh Chhatisgarh Chief Minister te vawiin khan a bia a. Pu Shaha chuan ruahsurin a tihbuai state-ahte hian chhanchhuah hna thawk turin NDRF team te tirhluh an nih thu a sawi a. Pu Shaha chuan atul ang zela puih an nih tur thu Chief Minister te hi a hrihlh a ni.

<><><>

PM

Prime Minister Narendra Modia chuan Trinidad and Tobago-a cheng India mi chhuan 6 na te chu Overseas Citizen of India (OCI) card pek an ni tawh dawn tih a sawi . PM Modia chuan Trinidad-a piang leh seilian India mite chu an thlahtute ram India rawn tlawh tur leh inpawhna thuk zawk rawn nei turin a sawm a.

Trinidad and Tobago chu Caribbean ram zingah UPI hmang hmasa ber an ni chu a lamwpui thu a sawi a. He UPI hian Trinidan and Tobago chauh niloin India tan pawh hlawkna tam tak a thlen dawn a ni a ti bawk.

Prime Minister Modia hian Trinidad and Tobago chawimawina sang he Order of Trinidad and Tobago' hlan anih tur thu Prime Minister Kamla Persad-Bissessar chuan a sawi a ni.

<><><>